

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

RAMADAN & EID MUBARAK!

15 Juin 2018
(30 Ramadhan 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l' Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « Quelques conseils pour ene Rozédaar ».

Pour sa dernier vendredi Ramadan là - 30^{ème} jour Ramadan 1439 Hijri / 15 Juin 2018 - mo envie donne zot quelques conseils à suivre pour ki sa bane jours de Ramadan là pas perdu et ki bane bon l'habitudes cultiver dans sa mois béni là rester. En premier lieu après Jummah, lire 2 *Rakaat Nafil*. Dans premier *Rakaat* après Surah Al-Fatiha, lire Surah Al-Ikhlaas 10 fois et dans second *Rakaat*, après Surah Al-Fatiha récite Surah Al-Kaafiroun 3 fois. Après Namaz récite *Darood Shariff* 10 fois.

Rassoollullah (saws) dire: « Ene Rozédaar so bane duahs zamais rejeter. » Sa c'est parski *Rozédaar* là so lé cœur repentant. En fait, li fine approche li avec Allah et obéir Li. Li fine abandonne so nourriture, par frayeur pour Allah, so lé Roi, Celui ki accorder. Ene *Rozédaar* fine restreindre so désires en obéissance au Maître des Cieux et de la terre.

Rassoollullah (saws) fine dire: « *Supplication c'est Ibaadat.* » Donc, si ou trouve ene serviteur pé demande la charité beaucoup en priant, pé faire longue *duahs*, longue *Sijdah* avec beaucoup de *duahs*, conner ki li bien proche avec Allah et confiant dans so Rab.

Bane *Sahaba* fine demander: « *Ya Rassoollullah (saws), eski nous Rab près avec nous et ki nous capave faire confiance avec Li secrètement ou bien Li loin et nous bizin crier pour Li tender.* » Allah (swt) fine révèle sa verset suivant là:

« Kan Mo bane serviteur pose toi question lor Moi (dire zot) ki Mo près avec zot. Mo réponde zot l'appel kan zot appel Moi. Mais zot aussi besoin écoute Mo l'appel et gagne la foi en Moi, afin ki zot trouve bon chemin. » (Al-Baqara 2: 187).

Rassoollullah (saws) fine aussi dire: « *Zot pas pé faire appel à ene sourd ou ene Allah absent. Vraiment zot pé faire appel à ene Celui ki trouver et tender et ki plus près avec zot ki li cou zot chameau.* »

Allah (swt) demande nous pour faire appel à Li. Allah dire dans Quran Shareef:

« Prier ou Maître avec soumission et en secret. Li pas content bane ki dépasse limites. » (Al-Arraf 7: 56).

Dans ene lotte place dans Quran, Allah dire:

« Faire appel à Moi, Mo va réponde zot l'appel. Bane ki faire vantard et refuse adore Moi pou entre dans l'enfer, humilié. » (Ghafir 40: 61).

Donc, avec beaucoup de tristesse et de chagrin le mois béni de Ramadan pé tire à sa fin et c'est avec ene regret terrible ki nous pé guette li aller. Mais nous bizin remercier Allah ki nous fine réussi trouve sa mois de Ramadan là sa l'année là, et nous bizin penser ki combien parmi nous ti là l'année passé mais ki zot pas parmi nous sa Ramadan là, kot zot fine quitte sa le monde là. Et nous bizin calculer aussi combien parmi nous fine réussi trouve le mois de Ramadan commencer, mais ki pas fine trouve li terminer.

Pour sa dernier vendredi de sa mois de Ramadan là, nous pas jette z'arme, et ni nous pas préoccupe nous avec bane z'affaires ki pas ena aucaine l'importance, ou sois nous pé content ki Ramadan pé terminer, et nous pour retourne dans nous bane péchés encore. Bé ki changement le mois de Ramadan fine apporter dans nous la vie alors si tous fine reste pareil? Ramadan aller, l'autre Ramadan vini; seulement dans mois Ramadan nous attache nous avec *Ibaadat*, *Roza*, *Zakaat*, alle Masjid etc., et après tous ré-vine normale couma nous ti habituer amène nous la vie dans sa onze mois là. En d'autres mots, malheureux à bane ki gagne Ramadan, change zot la vie pendant Ramadan mais ki retourne dans zot ancien condition avec tous zot bane vices du moment ki Ramadan aller. Zot aussi zot dire bye-bye avec bane *Néki* (bonnes actions) et la réforme physique, morale et spirituel de zot êtres.

Donc, bane ki retourne dans zot ancien mauvais condition, zot pas fine conne vrai valeur de sa mois béni de Ramadan là. Zot pas fine réussi dans sa l'entraînement spirituel ki Allah ti donne zot dans sa mois béni là. Au contraire, zot ti bizin saizi sa l'occasion en or là et profite au maximum sa bane bénédiction là et faire zot vine vraiment digne pou gagne la proximité d'Allah pour tous les temps, pas zis dans Ramadan. Celui ki réussi prend Ramadan comme ene vrai l'entraînement spirituel et conne suivre sa bane bons l'habitudes dans *Ibaadat* et *Zikr* ki li fine gagner pendant sa mois béni là, alors li pé ouvert pou li-même la porte du salut pour le reste de so la vie, si li faire sa bane jours là vine bane véritable trésors spirituels pou li. Celui ki attache li-même à Allah, en vérité Allah rapproche Li avec sa dimoune là et accède à so bane *duahs*/ requêtes/ supplications.

Kan Allah dire ki Li près et ki Li réponde l'appel de celui ki faire appel à Li, sa veut dire ki Li pou toujours là pou bane ki cherche Li et préserve zot proximité avec Li, et Li loin de bane ki reste loin avec Li. Plus ou faire zéfforts vers Allah, pli ou pou trouve Allah près avec ou, mais si ou néglige Allah, néglige pense Li et prier Li, alors ou pou ena l'impression ki Allah bien loin avec ou, malgré ki Allah toujours près de ou et pé observe ou et conne tous secrets de ou lécoeur, de ou l'âme.

Donc, reste attacher avec Allah avec *Salaat* (ki li *Farz*, *Sunnat* et *Nafil*), récitation Quran tous les jours, *Zikrullah*, *duahs*, bane actes de charité etc. Nous tous bizin reste dans le bain spirituel de sorte ki tous nous bane vices, couma nous bane péchés, la haine, jalousie, l'arrogance, l'avarice, bane discussions et disputes dans vide, tous disparaite couma disél.

Ô bane *Rozédaar*, zot fine fer tous bane sacrifices possible pendant sa mois sacré là. Zot fine résister la faim, la soif et fine reste loin avec bane interdits temporaires de sa mois béni là couma zot Rab fine instruire zot. *Alhamdulillah*. Mais faire de sorte ki après sa mois là aussi, tous zot bane bonnes actions pas perdi zot valeur. Faire valeur de zot bane bonnes actions multiplier devant lizié d'Allah, en continuant avec zot bane *Ibaadat* et *Zikr* et contigner faire bane bonnes actions ki pou faire plaisir à Allah. Couma Allah dire dans Quran Shareef:

« Tous sa bane là vraiment ti vif pou faire de bonnes actions. Zot ti prier Nous par contentement et avec la peur, et zot ti humilier zot devant Nous. » (Al-Anbiya 21: 91).

Après le mois de Ramadan, nous bizin reste couma ene *Rozédaar* kot bizin conne certains étiques de supplications, entre autre, résolutions le cœur et confiance dans générosité et faveurs Allah. Parmi bane étiques aussi bizin ki le serviteur d'Allah li faire louanges d'Allah et faire beaucoup *Darood Shariff*. Nous bizin aussi conscient de bane moments kan *duahs* accepter. Bizin aussi pas implore pour envoie *Lannat* (malédiction) lors lézot (*exception fait bien sûr pour bane Messagers d'Allah ki gagne l'instruction directe depuis kot Allah pou envoie Lannat - en cas de Mubahila - dans bane cas extrême lors bane l'ennemis d'Allah*). Mais en temps normale, sans ki ou fine gagne kit instruction divine, zamais faudé pas ou envoie *Lannat* lors ou prochain, même li ou l'ennemi, ni coupe relation familiale.

Donc, nous bizin faire zéfforts et cherche aide avec Allah (swt) pour vine bon envers nous-mêmes et nous demande Li tout seul, Celui ki subsister tout seul parski nous, nous pauvre et Li, Li riche. Nous, nous faible et Li, Li fort. Nous, ene jour nous pou mort tandis ki Allah Li Éternel.

Hazrat Ibrahim (as) ti prier de sa façon là: **« Ô mo Maître, faire moi régulier dans mo la prière, et aussi, ene partie mo descendants. Ô nous Maître, accepter l'appel ki mo pé faire Toi. Ô nous Maître, accorde moi, mo papa, mo mama, et bane ki gagne la foi, To pardon le jour kan pour faire compte là. »** (Ibrahim 14: 41-42).

Hazrat Moussa (as) kan à li, li ti faire la prière suivante: « **Ô mo Maître, ouvert mo lé cœur, facilite mo la tâche, libère mo la langue pou ki zot capave comprend moi. Donne moi kikaine pou aide moi, depuis mo famille. Haroun mo frère; augmente mo la force par li. Faire li prend ene part dans mo travail, afin ki nous capave faire To louanges beaucoup, et ki nous pense à Toi beaucoup, parski Toi, To pou garde lizié lors nous.** » (TaHa 20: 26-36).

Hazrat Sulaiman (as) ti prier so Maître (Allah) comme suite: « **Ô mo Maître, pardonne moi et donne moi ene royaume tel ki personne après moi pas pou mériter. C'est Toi le grand donateur.** » (Sad 38: 36).

Ena quatre l'avantages de supplications (*duahs*):

1. Réalisation ki *Ibaadat* pour Allah (swt), l'humilité envers Li et confiance en Li, c'est raison *Ibaadat* et so fruit.
2. Réponses à nous demande soit en offrant séki bon ou en empêchant saki faire du tort. Personne apart Allah péna pouvoir et sa capacité là.
3. Garde avec Allah récompenses nous demandes. Si Li pas accorde nous dans sa *duniya* là même, maziné ki Li fine réserve sa bane récompenses pour nous la vie éternel et sa même meilleure et plus bénéfique pour nous.
4. Bane supplications (*duahs*) exprime nous croyance dans l'unicité d'Allah et nous confiance dans Li. Li craze nous dépendance lors bane les autres kitchoses ki pas Allah, et au lieu nous rode faveurs avec bane les autres dimounes, c'est avec Allah tout seul ki nous demander et sa meilleure pour nous dans tous l'aspect.

Pour terminer, mo faire sa *duah* là:

Ô nous Maître! Donne nous séki bon dans sa le monde (*duniya*) là et dans l'autre monde (*Aakhérat*) et sauve nous avec punition du feu l'enfer. Ô nous Maître, pas faire nous les cœurs dévier après ki To fine guide nous et accorde nous To bénédiction. Vraiment c'est Toi ki donne tout saki bon. Ameen, Summa Ameen.